

I. DISPOSICIONES XERAIS

MINISTERIO DE EDUCACIÓN

7329 *Real decreto 557/2010, do 7 de maio, polo que se establecen os limiares de renda e patrimonio familiar e as contías das bolsas e axudas ao estudo do Ministerio de Educación para o curso 2010-2011.*

O Real decreto 1721/2007, do 21 de decembro, establece o novo réxime das bolsas e axudas ao estudo personalizadas, modificando o anteriormente vixente de xestión centralizada e regulando, con carácter básico, os parámetros precisos para asegurar a igualdade no acceso ás citadas bolsas e axudas ao estudo sen detrimento das competencias normativas e de execución das comunidades autónomas. Así, establece as normas xerais aplicables tanto ás bolsas territorializadas como a aquelas cuxa xestión corresponde ao Estado, os requisitos económicos e académicos para ser beneficiario e os principios e condicións de revogación e reintegro e incompatibilidade das bolsas e axudas estatais.

Porén, debido ao seu carácter cuantitativo, algúns dos referidos parámetros básicos deben ser obxecto de actualización periódica co fin de que non resulten devaluados polo transcurso do tempo. Para estes efectos, a disposición adicional primeira do mencionado Real decreto 1721/2007 encoméndalle ao Goberno a determinación destes parámetros variables para cada curso académico, mediante un real decreto que se aprobará anualmente, logo de consulta ás comunidades autónomas.

Por outra parte, conforme a disposición adicional novena da Lei 24/2005, do 18 de novembro, de reforma para o impulso da produtividade, as bolsas e axudas ao estudo que se convoquen para seguir estudos regrados e para as cales non se fixe un número determinado de persoas beneficiarias concederánselle de forma directa ao alumnado tanto universitario coma non universitario. Dispón, así mesmo, a citada lei que a contía das referidas bolsas e axudas ao estudo se fixará en función dos custos que xere a educación para os estudantes, así como das circunstancias socioeconómicas da súa unidade familiar e que se concederán atendendo, cando proceda, ao aproveitamento académico e aos niveis de renda e patrimonio con que conte a unidade familiar. Por último, dispón que o seu réxime se establecerá por real decreto, que deberá contar con informe favorable do Ministerio de Economía e Facenda.

En cumprimento destes preceptos, este real decreto establece, para o curso académico 2010-2011, os parámetros económicos das bolsas e axudas ao estudo do Ministerio de Educación que se convocan sen un número determinado de persoas beneficiarias, fixando as súas contías, así como os limiares de patrimonio e renda familiar por encima dos cales desaparece o dereito á súa obtención.

Polo que se refire ás ensinanzas universitarias, o curso académico 2010-2011 preséntase cunha especial relevancia, dado que se xeneraliza a implantación da nova estrutura das ensinanzas universitarias de grao, todo isto de acordo coas liñas xerais do Espazo Europeo de Educación Superior. Os novos plans de estudos implantaranse ao longo dos próximos anos e producirase, por outra parte, a extinción gradual das ensinanzas universitarias que se levan a cabo conforme plans de estudos anteriores.

O sistema de bolsas e axudas ao estudo, adaptado para grao e máster, que se deberá desenvolver evolutivamente no transcurso do período 2010-2015, débese orientar cara á mellora do actual sistema, superando a actual atomización de pequenas axudas de dubidosa eficacia. No marco do novo modelo de financiamento das universidades españolas propónse, por iso, avanzar na definición dunha nova estrutura de bolsas máis simple e compacta, que potencie de forma clara o concepto de bolsa salario, introducida polo Real decreto 922/2009, do 29 de maio, para os estudantes de grao e que este curso tamén se estende a quen cursa formación profesional de grao superior. Existirá tamén unha bolsa xeral universitaria concibida como unha bolsa intermedia dirixida aos estudantes

que dispoñen de renda familiar suficiente para os seus gastos básicos (alimentación, residencia, etc.) pero que, a pesar diso, necesitan algunha axuda para custear outro tipo de gastos que faciliten unha maior dedicación ao estudo. Outro dos grandes obxectivos do novo modelo será o impulso á mobilidade a cuxa consecución se dirixirá unha modalidade de bolsas ligadas á mobilidade dentro do territorio español, que pretenden apoiar economicamente os estudantes que teñen que abandonar o seu domicilio familiar para cursar os seus estudos, coa intención de que poidan escoller a mellor elección académica sen depender da súa renda familiar ou da oferta académica de proximidade. Estas bolsas estarán asociadas á política de aloxamento universitario que quere impulsar o Ministerio e ao avance cara a modelos mixtos, que combinen a retribución económica coa asignación en especie.

No pasado curso 2009-2010 iniciouse a transición cara a este novo modelo de bolsas, inspirado nos criterios de equidade e de eficacia. Creouse a «bolsa de mantemento» destinada a alumnos dos módulos voluntarios dos programas de cualificación profesional inicial. Para os estudantes universitarios de grao creouse, así mesmo, unha nova modalidade de bolsa compensatoria baixo a fórmula de «bolsa salario» e introducíronse, ademais, diversas medidas para facilitar o acceso e a continuación dos estudos universitarios aos estudantes afectados por discapacidade. Para o próximo curso 2010-2011 mantéñense eses mesmos compoñentes de bolsa, e esténdese a bolsa salario aos estudantes de ciclos formativos de grao superior.

Polo que se refire aos limiares de renda familiar, actualízase o limiar 1, que dá dereito á obtención da bolsa salario e o compoñente de compensatoria na porcentaxe rexistrada de variación dos salarios pactados, é dicir, nun 2,6 por cento con relación aos vixentes no curso 2009-2010, e mantense a marxe de intervalo naqueles limiares en que se fixaba un mínimo e un máximo para a súa aplicación de acordo co previsto na letra e) da disposición adicional primeira do Real decreto 1721/2007, do 21 de decembro. Así mesmo, e de acordo coa Dirección Xeral do Catastro, actualízanse os limiares máximos dos valores catastrais tanto dos predios urbanos coma dos predios rústicos.

En canto ás contías, increméntanse de forma xeral nun 1 por cento con relación ás do curso anterior, coa excepción da bolsa salario para os estudantes de grao, que o fai nun 25 por cento. Con isto preténdese que a ausencia de ingresos pola dedicación plena aos estudos universitarios permita unha mellor adaptación aos requirimentos das titulacións do Espazo Europeo de Ensino Superior sen menoscabo do rendemento académico.

Este real decreto conta con informes favorables do Ministerio de Economía e Facenda e do Ministerio de Política Territorial. Foi, ademais, obxecto de ditame polo Consello Escolar do Estado e na súa tramitación foron consultadas as comunidades autónomas, a través da Comisión Xeral de Educación da Conferencia Sectorial e da Comisión Xeral de Política Universitaria.

Na súa virtude, por proposta do ministro de Educación, de acordo co Consello de Estado, e logo de deliberación do Consello de Ministros na súa reunión do día 7 de maio de 2010,

DISPOÑO:

CAPÍTULO I

Disposicións xerais

Artigo 1. *Obxecto.*

Este real decreto ten por obxecto determinar os seguintes parámetros cuantitativos polos que se rexerán as convocatorias de bolsas e axudas ao estudo correspondentes ao curso académico 2010-2011 financiadas con cargo ao orzamento do Ministerio de Educación:

a) A contía dos compoñentes das diferentes modalidades das bolsas e axudas ao estudo regulados no Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas.

b) Os limiares de renda e patrimonio familiar por encima dos cales desaparece o dereito á percepción das bolsas e axudas ao estudo.

Artigo 2. *Ámbito de aplicación.*

1. Para o curso académico 2010-2011 e, con cargo aos créditos correspondentes dos orzamentos xerais do Estado, convocaranse bolsas sen número determinado de persoas beneficiarias para as seguintes ensinanzas:

- a) Bacharelato.
- b) Formación profesional de grao medio e de grao superior.
- c) Ensinanzas artísticas profesionais.
- d) Ensinanzas deportivas.
- e) Estudos de idiomas realizados en escolas oficiais de titularidade das administracións educativas, incluída a modalidade de distancia.
- f) Ensinanzas universitarias adaptadas ao Espazo Europeo de Educación Superior conducentes a títulos oficiais de grao e de máster, incluídos, de ser o caso, os correspondentes aos complementos de formación necesarios para o acceso ao máster.
- g) Ensinanzas universitarias conducentes aos títulos oficiais de licenciado, enxeñeiro, arquitecto, diplomado, mestre, enxeñeiro técnico e arquitecto técnico, incluídos os complementos de formación para diplomados universitarios que desexen proseguir estudos oficiais de licenciatura.
- h) Ensinanzas artísticas superiores.
- i) Estudos relixiosos superiores.
- j) Estudos militares superiores.

2. Para o curso académico 2010-2011 e con cargo aos créditos correspondentes dos orzamentos xerais do Estado convocaranse axudas ao estudo sen número determinado de persoas beneficiarias para as seguintes ensinanzas:

- a) Cursos de preparación para as probas de acceso á formación profesional impartidos en centros públicos.
- b) Programas de cualificación profesional inicial.
- c) Curso de preparación para o acceso á universidade de maiores de 25 anos impartido por universidades públicas.
- d) Ensinanzas non universitarias adaptadas ao alumnado con necesidade específica de apoio educativo derivada de discapacidade e trastorno de conduta ou de alta capacidade intelectual.

CAPÍTULO II

Bolsas e axudas ao estudo de carácter xeral

Artigo 3. *Estudos comprendidos.*

Convocarase bolsas e axudas ao estudo de carácter xeral para o alumnado de bacharelato, de formación profesional, de ensinanzas deportivas, de ensinanzas de idiomas, de programas de cualificación profesional inicial, de ensinanzas artísticas, doutras ensinanzas superiores, de ensinanzas universitarias conducentes ao título oficial de licenciado, de enxeñeiro, de arquitecto, de diplomado, de mestre, de enxeñeiro técnico e de arquitecto técnico, así como para as ensinanzas universitarias conducentes ao título oficial de grao e de máster que se cursen en universidades españolas.

Artigo 4. *Compoñentes e contías para as ensinanzas non universitarias.*

1. Os compoñentes e contías das bolsas e axudas ao estudo de carácter xeral para as ensinanzas de bacharelato, formación profesional, artísticas profesionais,

deportivas, de idiomas e programas de cualificación profesional inicial serán os seguintes:

Compoñentes		Ciclos formativos de grao superior con duración dun curso máis prácticas	Ciclos formativos de grao medio con duración dun curso máis prácticas	Ciclos formativos de grao superior	Ciclos formativos de grao medio	Programas de cualificación profesional inicial	Demais estudos deste artigo
De compensación.	Bolsa salario	3.061		2.513			
	Axuda compensatoria		2.429		2.040		2.040
	Bolsa de mantemento					1.363	
Por desprazamento.	Desprazamento de 5 a 10 km						192
	Desprazamento de máis de 10 a 30 km						386
	Desprazamento de máis de 30 a 50 km						763
	Desprazamento de máis de 50 km						937
Outros compoñentes.	Residencia	3.000	3.000	2.556	2.556		2.556
	Escolarización						581
	Escolarización en centros municipais						291
	Escolarización en centros con concerto singular						226
	Proxecto de fin de carreira	543		543			
	Material escolar	217	204	217	204	204	204
	Suplemento cidades	204					

2. A bolsa salario será incompatible co compoñente de material escolar. O compoñente de residencia será incompatible cos compoñentes de desprazamento.

3. Con excepción dos beneficiarios do compoñente de residencia, todos os demais bolseiros a que se refire este artigo que cursen estudos presenciais nunha localidade de máis de 100.000 habitantes recibirán, ademais dos compoñentes a que teñan dereito, un suplemento de 204 euros.

4. O alumnado de programas de cualificación profesional inicial poderá obter os compoñentes de material escolar, desprazamento e escolarización e, de ser o caso, o suplemento de cidades. O alumnado que curse os módulos voluntarios poderá obter, ademais, o compoñente de mantemento, que se aboará de forma fraccionada e cuxa obtención quedará condicionada ao aproveitamento académico do bolseiro durante o curso 2010-2011.

5. O alumnado matriculado en centros públicos para seguir cursos de preparación para as probas de acceso á formación profesional poderá obter os compoñentes de material escolar, desprazamento e, de ser o caso, o suplemento de cidades.

O alumnado que curse estudos de idiomas en escolas oficiais poderá obter os compoñentes de material escolar, desprazamento e, de ser o caso, o suplemento de cidades.

6. Aqueles que, de conformidade co disposto no artigo 18 no Real decreto 1721/2007, do 21 de decembro, utilicen a oferta específica para persoas adultas ou oferta de matrícula parcial poderán obter os compoñentes para escolarización, desprazamento e material escolar e, de ser o caso, o suplemento de cidades. As contías destes compoñentes poderanse ponderar en función da carga lectiva e do horario escolar.

7. O alumnado que curse estudos oficiais de bacharelato ou formación profesional a distancia poderá obter o compoñente de material escolar coas contías establecidas neste real decreto e nas condicións que se determinen na correspondente convocatoria. Ademais, poderá obter unha contía máxima de 386 euros en concepto de desprazamento cando non resida na mesma localidade en que radique a sede do centro colaborador ou a extensión do centro de bacharelato a distancia, para as asistencias programadas polo centro a distancia.

8. Os limiares de renda aplicables para a concesión dos compoñentes das bolsas e axudas ao estudo previstas neste artigo serán os seguintes:

a) Para a concesión do compoñente de compensatoria e de bolsa salario, a renda familiar do solicitante non poderá superar o limiar 1 de renda familiar establecido neste real decreto.

b) Para a concesión do compoñente de escolarización, a renda familiar do solicitante non poderá superar o limiar 2 de renda familiar.

c) Para a concesión do compoñente de residencia, a renda familiar do solicitante non poderá superar o limiar 4 de renda familiar. Estes solicitantes tamén poderán recibir o compoñente de material.

d) Para a concesión da bolsa básica, é dicir, do material escolar e, de ser o caso, do suplemento de cidades, como únicos compoñentes, a renda familiar do solicitante non poderá superar o limiar 5 de renda familiar.

e) Para a concesión dos demais compoñentes de bolsa, a renda familiar do solicitante non poderá superar o limiar 3 de renda familiar.

Artigo 5. Compoñentes e contías para as ensinanzas universitarias e outros estudos superiores.

1. Os compoñentes e as contías das bolsas de carácter xeral para as ensinanzas universitarias conducentes ao título de grao, de máster, de licenciado, de enxeñeiro, de arquitecto, de diplomado, de mestre, de enxeñeiro técnico e de arquitecto técnico, de ensinanzas artísticas e doutras ensinanzas superiores serán os seguintes:

Compoñentes da bolsa		Ensinanzas adaptadas ao EEES		Demais ensinanzas deste artigo
		Estudios universitarios de grao	Máster	
De compensación.	Axuda compensatoria.		2.550,00	2.550,00
	Bolsa salario.	3.500,00		
Por desprazamento.	Desprazamento de 5 a 10 km.	192,00 €		
	Desprazamento de máis de 10 a 30 km.	386,00 €		
	Desprazamento de máis de 30 a 50 km.	763,00 €		
	Desprazamento de máis de 50 km.	937,00 €		
	Transporte urbano.	185,00 €		
Outros compoñentes.	Residencia.	2.556,00 €		
	Material para estudos.	244,00 €		
	Matrícula para estudos universitarios.	Importe dos prezos públicos oficiais por servizos académicos para o curso 2010-2011.		
	Proxecto de fin de carreira.			543,00 €

2. A bolsa salario será incompatible cos compoñentes de material para estudos e transporte urbano. O compoñente de residencia será incompatible cos compoñentes de desprazamento e estes, pola súa vez, son incompatibles co de transporte urbano.

3. Aqueles que opten pola matrícula parcial e aqueles que realicen o curso de preparación para o acceso á universidade na súa modalidade presencial poderán obter unicamente os compoñentes de matrícula, desprazamento, transporte urbano e material de estudos. As contías destes compoñentes poderanse ponderar en función da carga lectiva e do horario lectivo.

4. O alumnado que curse estudos universitarios non presenciais, incluído o curso de preparación para o acceso de maiores de 25 anos, poderá obter o compoñente de material de estudos e o compoñente de matrícula coas contías establecidas neste real

decreto e nas condicións que se determinen na correspondente convocatoria. Ademais, poderán obter unha contía máxima de 386 euros en concepto de desprazamento cando non residan na mesma localidade en que radique a sede do centro asociado ou colaborador.

5. A bolsa de matrícula financiará o prezo público oficial para os servizos académicos no ámbito de cada comunidade autónoma. No caso dos estudantes de universidades privadas, o importe desta bolsa non excederá os prezos públicos oficiais establecidos para a mesma titulación e plan de estudos nos centros de titularidade pública da súa mesma comunidade autónoma. A contía da bolsa será a do importe dos prezos públicos oficiais por servizos académicos para o curso 2010-2011 e alcanzará o mínimo de créditos necesarios para obter a titulación de que se matriculase e para a que se lle concede a bolsa.

6. A bolsa de proxecto fin de carreira está destinada a facilitar un importe ou beneficio económico aos estudantes de ensinanza técnica e doutros estudos superiores en que se requira a superación dese proxecto para a obtención do título. Non será aplicable cando o proxecto estea configurado dentro do plan de estudos e cuxos créditos formen parte do mínimo para a obtención do título ou cando se realice asemade con algún dos cursos da carreira. Os beneficiarios universitarios da bolsa de proxecto fin de carreira poderán obter igualmente a bolsa de matrícula e de material para estudo.

7. Os limiares de renda aplicables para a concesión dos compoñentes das bolsas e axudas ao estudo previstas neste artigo serán os seguintes:

a) Para a concesión do compoñente de compensatoria e de bolsa salario, a renda familiar do solicitante non poderá superar o limiar 1 establecido neste real decreto.

b) Para a concesión do compoñente de residencia, a renda familiar do solicitante non poderá superar o limiar 4 establecido neste real decreto. Os solicitantes que obteñan o compoñente de residencia tamén poderán recibir o compoñente de material de estudo e de transporte urbano.

c) Para a concesión da matrícula como único compoñente, a renda familiar do solicitante non poderá superar o limiar 5 establecido neste real decreto.

d) Para a concesión dos demais compoñentes de bolsa, a renda familiar do solicitante non poderá superar o limiar 3 establecido neste real decreto.

Artigo 6. *Contías adicionais.*

As contías das bolsas e axudas ao estudo establecidas nos artigos 4 e 5 deste real decreto incrementaranse nas seguintes contías:

a) A contía do compoñente de residencia incrementarase en 204 euros cando o centro docente a que asista o alumno radique nunha localidade de máis de 100.000 habitantes. Esta contía adicional será de 350 euros cando esa poboación supere os 500.000 habitantes.

b) Conforme o mandato contido no artigo 138.1 da Constitución, as persoas beneficiarias de bolsa con domicilio familiar na España insular, ou en Ceuta ou Melilla, que se vexan na necesidade de utilizar transporte marítimo ou aéreo para acceder ao centro docente en que cursen os seus estudos desde o seu domicilio disporán de 433 euros máis sobre a contía da bolsa que lles correspondese.

c) Esta cantidade adicional será de 611 euros para os bolseiros con domicilio familiar nas illas de Lanzarote, Fuerteventura, Gomera, Hierro e La Palma, Menorca e as Pitiusas. Estes complementos de bolsa serán tamén aplicables ao alumnado matriculado en centros oficiais de bacharelato a distancia que resida en territorio insular que careza de centro asociado ou colaborador.

d) No caso de que o alumnado teña que desprazarse entre as illas Canarias e a Península, as cantidades a que se refiren as dúas alíneas anteriores serán de 871 euros e 919 euros, respectivamente.

CAPÍTULO III

Bolsas de mobilidade

Artigo 7. *Estudos comprendidos.*

1. Convocaranse bolsas de mobilidade para o alumnado que curse en modalidade presencial e en centros situados nunha comunidade autónoma distinta á do seu domicilio familiar algunha das seguintes ensinanzas: artísticas superiores, estudos relixiosos superiores, ensinanzas conducentes aos títulos de licenciado, enxeñeiro, arquitecto, diplomado, mestre, enxeñeiro técnico e arquitecto técnico, así como para as ensinanzas universitarias conducentes ao título de grao e de másteres oficiais que se cursen en universidades españolas.

2. As modalidades e contías das bolsas de mobilidade serán as seguintes:

Modalidades	Estudantes con domicilio familiar en Illes Balears – Euros	Estudantes con domicilio familiar en Canarias, Ceuta ou Melilla – Euros	Resto de estudantes – Euros
Xeral de mobilidade con residencia	3.947,00	4.255,00	3.336,00
Especial de mobilidade con residencia	6.667,00	6.975,00	6.056,00
Xeral de mobilidade sen residencia	–	–	1.592,00
Especial de mobilidade sen residencia	–	–	3.772,00

3. Os limiares de renda aplicables para a concesión dos compoñentes das bolsas de mobilidade serán os seguintes:

- Para a concesión das modalidades especiais de bolsa de mobilidade, a renda familiar do solicitante non poderá superar o limiar 1 establecido neste real decreto.
- Para a concesión da bolsa xeral de mobilidade sen residencia, a renda familiar do solicitante non poderá superar o limiar 3 establecido neste real decreto.
- Para a concesión da bolsa xeral de mobilidade con residencia, a renda familiar do solicitante non poderá superar o limiar 4 establecido neste real decreto.
- Para a concesión da matrícula como único compoñente, a renda familiar do solicitante non poderá superar o limiar 5 establecido neste real decreto.

CAPÍTULO IV

Axudas para o alumnado con necesidade específica de apoio educativo

Artigo 8. *Estudos comprendidos.*

1. Convocaranse axudas ao estudo e subsidios para o alumnado con necesidade específica de apoio educativo derivada de discapacidade ou trastorno de conduta ou asociada a alta capacidade intelectual que curse estudos nos niveis de segundo ciclo de educación infantil, educación primaria, educación secundaria obrigatoria, bacharelato, ciclos formativos de grao medio e de grao superior e programas destinados á obtención dunha cualificación profesional inicial. Os subsidios atenderán os gastos de comedor escolar e de transporte escolar e concederánselle ao alumnado con necesidades educativas especiais que pertenza a familias numerosas.

2. Os compoñentes e as contías das axudas e subsidios para o alumnado con necesidade específica de apoio educativo derivada de discapacidade serán os seguintes:

Compoñentes	Educación primaria, ESO e programas de cualificación profesional inicial – Euros	Resto de niveis educativos – Euros
Axuda de ensino	Ata 862,00	Ata 862,00.
Axuda ou subsidio de transporte escolar	Ata 617,00	Ata 617,00.
Axuda ou subsidio de comedor escolar	Ata 574,00	Ata 574,00.
Axuda de residencia escolar	Ata 1.795,00	Ata 1.795,00.
Axuda para transporte de fin de semana	Ata 442,00	Ata 442,00.
Axuda para transporte urbano	Ata 308,00	Ata 308,00.
Axuda para material escolar	Ata 105,00	Ata 204,00.
Axuda para reeducación pedagóxica	Ata 913,00	Ata 913,00.
Axuda para reeducación da linguaxe	Ata 913,00	Ata 913,00.

3. As contías establecidas na táboa anterior para as axudas ou subsidios de transporte incrementaranse ata nun 50 por cento cando o alumno teña unha discapacidade motora recoñecida superior ao 65 por cento.

4. Non se concederán axudas nin subsidios cando os gastos a que atenden estean cubertos suficientemente por servizos ou fondos públicos ou, de ser o caso, por axudas concedidas aos centros para financiar o correspondente servizo. No nivel de educación infantil non se concederán axudas para material escolar.

5. O alumnado con altas capacidades intelectuais poderá obter, nos termos previstos no artigo 11 do Real decreto 1721/2007, do 21 de decembro, unha axuda de ata 913 euros para o pagamento dos gastos derivados da inscrición e asistencia a programas específicos para este colectivo.

6. Os limiares de renda aplicables para a concesión dos compoñentes das axudas ao estudo e subsidios para o alumnado con necesidade específica de apoio educativo serán os seguintes:

- a) Para a concesión destas axudas, a renda familiar do solicitante non poderá superar o limiar 3 establecido neste real decreto.
- b) Para a concesión dos subsidios non se atenderá á renda nin ao patrimonio familiar.

CAPÍTULO V

Os limiares de renda e patrimonio familiar

Artigo 9. *Limiares de renda familiar.*

1. De conformidade co previsto na letra e) da disposición adicional primeira do Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas, o limiar 1 de renda familiar para o curso 2010-2011 fixarase nas convocatorias que aproben o Ministerio de Educación e as administracións educativas competentes que asumisen o pleno exercicio das competencias previstas nese real decreto.

O Ministerio de Educación financiará a totalidade das bolsas suxeitas ao extremo inferior do intervalo recollido na seguinte táboa. As bolsas que se lles concedan aos estudantes cuxa renda familiar se sitúe dentro do intervalo fixado financiaranse ao cincuenta por cento entre o Ministerio de Educación e a comunidade autónoma convocante.

Familias dun membro: entre 3.771,00 e 3.962,00 euros.

Familias de dous membros: entre 7.278,00 e 7.646,00 euros.

Familias de tres membros: entre 10.606,00 e 11.143,00 euros.
Familias de catro membros: entre 13.909,00 e 14.613,00 euros.
Familias de cinco membros: entre 17.206,00 e 18.076,00 euros.
Familias de seis membros: entre 20.430,00 e 21.463,00 euros.
Familias de sete membros: entre 23.580,00 e 24.773,00 euros.
Familias de oito membros: entre 26.660,00 e 28.009,00 euros.

A partir do oitavo membro engadiranse entre 3.079 e 3.235 euros por cada novo membro computable da familia.

2. O limiar 2 de renda familiar para o curso 2010-2011 será o recollido na seguinte táboa:

Familias dun membro: 10.668,00 euros.
Familias de dous membros: 17.377,00 euros.
Familias de tres membros: 22.820,00 euros.
Familias de catro membros: 27.069,00 euros.
Familias de cinco membros: 30.717,00 euros.
Familias de seis membros: 34.241,00 euros.
Familias de sete membros: 37.576,00 euros.
Familias de oito membros: 40.882,00 euros.

A partir do oitavo membro engadiranse 3.282,00 euros por cada novo membro computable da familia.

3. O limiar 3 de renda familiar para o curso 2010-2011 será o recollido na seguinte táboa:

Familias dun membro: 11.937,00 euros.
Familias de dous membros: 19.444,00 euros.
Familias de tres membros: 25.534,00 euros.
Familias de catro membros: 30.287,00 euros.
Familias de cinco membros: 34.370,00 euros.
Familias de seis membros: 38.313,00 euros.
Familias de sete membros: 42.041,00 euros.
Familias de oito membros: 45.744,00 euros.

A partir do oitavo membro engadiranse 3.672,00 euros por cada novo membro computable da familia.

4. O limiar 4 de renda familiar para o curso 2010-2011 será o recollido na seguinte táboa:

Familias dun membro: 13.236,00 euros.
Familias de dous membros: 22.594,00 euros.
Familias de tres membros: 30.668,00 euros.
Familias de catro membros: 36.421,00 euros.
Familias de cinco membros: 40.708,00 euros.
Familias de seis membros: 43.945,00 euros.
Familias de sete membros: 47.146,00 euros.
Familias de oito membros: 50.333,00 euros.

A partir do oitavo membro engadiranse 3.181,00 euros por cada novo membro computable da familia.

5. De conformidade co previsto na letra e) da disposición adicional primeira do Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas, o limiar 5 de renda familiar para o curso 2010-2011 fixarase nas convocatorias que aproben o Ministerio de Educación e as administracións educativas competentes que asumisen o pleno exercicio das competencias previstas nese real decreto.

O Ministerio de Educación financiará a totalidade das bolsas suxeitas ao extremo inferior do intervalo recollido na seguinte táboa. As bolsas que se lles concedan aos estudantes cuxa renda familiar se sitúe dentro do intervalo fixado financiaranse ao cincuenta por cento entre o Ministerio de Educación e a comunidade autónoma convocante.

Familias dun membro: entre 14.112,00 e 14.826,00 euros.
Familias de dous membros: entre 24.089,00 e 25.308,00 euros.
Familias de tres membros: entre 32.697,00 e 34.352,00 euros.
Familias de catro membros: entre 38.831,00 e 40.796,00 euros.
Familias de cinco membros: entre 43.402,00 e 45.598,00 euros.
Familias de seis membros: entre 46.853,00 e 49.224,00 euros.
Familias de sete membros: entre 50.267,00 e 52.810,00 euros.
Familias de oito membros: entre 53.665,00 e 56.380,00 euros.

A partir do oitavo membro engadiranse entre 3.391 e 3.562 euros por cada novo membro computable da familia.

6. No suposto de que, resolta a convocatoria, o número de bolseiros resulte inferior ao do curso académico 2009-2010 incrementado nun 10 por cento, o Ministerio de Educación poderá elevar progresivamente os limiares de renda familiar, sen exceder dun 10 por cento. Se esta elevación de limiares afectase o limiar 1 ou o limiar 5, os compromisos de financiamento do Ministerio de Educación entenderanse adaptados aos novos parámetros.

Artigo 10. *Cálculo da renda familiar.*

1. A renda familiar, para efectos de bolsa ou axuda, obterase por agregación das rendas de cada un dos membros computables da familia que obteñan ingresos de calquera natureza, calculadas segundo se indica nos parágrafos seguintes e de conformidade coa normativa reguladora do imposto sobre a renda das persoas físicas. Para efectos das bolsas e axudas ao estudo do curso 2010-2011, computarase o exercicio 2009.

2. Para a determinación da renda dos membros computables que presentasen declaración polo imposto sobre a renda das persoas físicas, procederase do modo seguinte:

a) Sumarase a base imponible xeral coa base imponible do aforro, excluindo os saldos netos negativos de ganancias e perdas patrimoniais correspondentes a exercicios anteriores a 2009 e o saldo neto negativo de rendementos do capital mobiliario que constitúen a renda do aforro correspondente a 2008.

b) Deste resultado restarase a cota resultante da autoliquidación.

3. Para a determinación da renda dos demais membros computables que obteñan ingresos propios e non presentasen declaración polo imposto sobre a renda das persoas físicas seguirase o procedemento descrito na alínea a) anterior e do resultado obtido restaranse os pagamentos á conta efectuados.

Artigo 11. *Deducións da renda familiar.*

No curso 2010-2011 aplicaranse as seguintes deducións da renda familiar:

a) O 50 por cento dos ingresos achegados por calquera membro computable da familia distinto dos sustentadores principais.

b) 500 euros por cada irmán, incluído o solicitante, que conviva no domicilio familiar, cando se trate de familias numerosas de categoría xeral e 765 euros para familias numerosas de categoría especial, sempre que teña dereito a este beneficio. Cando sexa o propio solicitante o titular da familia numerosa, as cantidades sinaladas serán computadas en relación cos fillos que a compoñan. Esta dedución será de ata 2.000 euros na convocatoria de axudas para alumnado con necesidade específica de apoio educativo.

c) 1.811 euros por cada irmán ou fillo do solicitante ou o propio solicitante que estea afectado de minusvalidez, legalmente recoñecida, de grao igual ou superior ao 33 por cento. Esta dedución será de 2.881 euros cando a minusvalidez sexa de grao igual ou superior ao 65 por cento. Esta dedución será de ata 4.000 euros na convocatoria de axudas para alumnado con necesidade específica de apoio educativo.

d) 1.176 euros por cada fillo menor de 25 anos que curse estudos universitarios e resida fóra do domicilio familiar, cando sexan dous ou máis os fillos estudantes con residencia fóra do domicilio familiar por razón de estudos universitarios.

e) Incrementarase o limiar de renda familiar aplicable nun 20 por cento cando o solicitante sexa orfo absoluto.

Artigo 12. *Limiars indicativos de patrimonio familiar.*

1. Calquera que sexa a renda familiar calculada segundo o disposto nos artigos 10 e 11, denegarase a bolsa ou axuda solicitada para o curso 2011-2011 cando se superen os limiars indicativos de patrimonio familiar que se fixan a continuación.

a) A suma dos valores catastrais dos predios urbanos que pertencen aos membros computables da familia, excluída a vivenda habitual, non poderá superar os 42.900 euros. En caso de inmobles nos cales a data de efecto da última revisión catastral estivese comprendida entre o 1 de xaneiro de 1990 e o 31 de decembro de 2002, multiplicaranse os valores catastrais por 0,49. No caso de que a data da mencionada revisión fose posterior ao 31 de decembro de 2002, os valores catastrais multiplicaranse polos coeficientes seguintes:

Por 0,43 os revisados en 2003.

Por 0,37 os revisados en 2004.

Por 0,30 os revisados en 2005.

Por 0,26 os revisados en 2006.

Por 0,25 os revisados en 2007.

Por 0,25 os revisados en 2008.

Por 0,26 os revisados en 2009.

Nos inmobles situados na Comunidade Foral de Navarra, o valor catastral multiplicarase en todo caso por 0,50.

A Dirección Xeral do Catastro facilitará a relación de municipios que correspondan a cada unha das situacións indicadas, para os efectos de aplicación do coeficiente de ponderación.

b) A suma dos valores catastrais dos predios rústicos que pertencen aos membros computables da familia non poderá superar 13.130 euros por cada membro computable.

c) A suma dos rendementos netos reducidos do capital mobiliario máis o saldo neto positivo de ganancias e perdas patrimoniais pertencente aos membros computables da familia excluíndo as subvencións recibidas para adquisición ou rehabilitación da vivenda habitual e, de ser o caso, a renda básica de emancipación non poderá superar os 1.700 euros.

Non se terán en conta para os efectos previstos neste punto os premios en metálico ou en especie obtidos pola participación en xogos, concursos, rifas ou combinacións aleatorias ata o límite de 1.500 euros.

En todo caso, os elementos indicativos do patrimonio computaranse de conformidade co disposto na normativa do imposto sobre a renda das persoas físicas polo seu valor o 31 de decembro de 2009.

2. Cando sexan varios os elementos indicativos do patrimonio descritos no punto anterior de que dispoñan os membros computables da familia, calcularase a porcentaxe de valor de cada elemento respecto do limiar correspondente. Denegarase a bolsa cando a suma das referidas porcentaxes supere cen. Porén, se unha vez resultas as convocatorias o número de bolseiros resultase inferior ao do curso 2009-2010 incrementado nun 10 por

cento, o Ministerio de Educación poderá determinar que non se aplique o disposto neste punto.

3. Tamén se denegará a bolsa ou axuda ao estudo solicitada cando as actividades económicas de que sexan titulares os membros computables da familia teñan un volume de facturación, en 2009, superior a 155.500 euros.

4. Para os efectos do cómputo do valor dos elementos a que se refiren os parágrafos anteriores, deducirase o 50 por cento do valor daqueles que pertencen a calquera membro computable da familia, excluídos os sustentadores principais.

Disposición adicional primeira. *Requisitos académicos para os alumnos doutros estudos superiores.*

Nos estudos superiores non integrados na universidade organizados por cursos académicos requirirase, para efectos da obtención de bolsa, que o solicitante se matricule por cursos completos.

Nos restantes casos deses estudos será preciso que o solicitante se matricule, como mínimo, do número de créditos ou materias que resulte de dividir o total dos que integran o plan de estudos polo número de anos que o compoñan. En todo caso, ese número de anos deberase axustar ao establecido nos reais decretos polos cales se establecen os aspectos básicos comúns dos plans de estudo destas ensinanzas.

En ambos os supostos, estes mínimos non serán exhibibles cando ao solicitante lle falte un número menor de créditos ou materias para finalizar os seus estudos, caso en que se deberá matricular de todos eles.

Disposición adicional segunda. *Medidas específicas para compensar as desvantaxes dos estudantes universitarios con discapacidade.*

1. A contía dos compoñentes que se determinen das bolsas e axudas ao estudo fixadas para os estudantes universitarios, con excepción da relativa á bolsa de matrícula, poderase incrementar ata nun 50 por cento cando o solicitante estea afectado dunha discapacidade de grao igual ou superior ao 65 por cento, legalmente cualificada.

Non se concederán axudas cando os gastos a que atenden estean cubertos suficientemente por servizos ou fondos públicos.

2. As deducións previstas na renda familiar especificadas nas letras b) e c) do artigo 11 para o alumnado con necesidade específica de apoio educativo aplicaranse igualmente aos estudantes universitarios dunha discapacidade de grao igual ou superior ao 65 por cento, legalmente cualificada.

3. O número de créditos de que deban quedar matriculados os solicitantes de bolsa e que se establecerá nas convocatorias correspondentes minorarase no caso dos estudantes afectados de discapacidade legalmente cualificada e a carga lectiva necesaria para cumprir o requisito de matriculación reducirase nun 50 por cento, como máximo, cando o solicitante estea afectado de discapacidade de grao igual ou superior ao 65 por cento.

Disposición transitoria primeira. *Axudas para a adquisición de libros convocadas polas comunidades autónomas.*

Durante o curso 2010-2011 non serán de aplicación as normas reguladoras dos requisitos económicos contidas neste real decreto e no Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas, ás convocatorias de axudas para a adquisición de libros de texto e material escolar nos niveis obrigatorios publicadas polas comunidades autónomas ao abeiro dun convenio de colaboración co Ministerio de Educación.

Disposición transitoria segunda. *Convenios de cofinanciamento.*

Excepcionalmente para o curso 2010-2011 as comunidades autónomas que iniciasen a negociación para o traspaso das funcións e servizos en materia de xestión de bolsas e

axudas ao estudo personalizadas, de conformidade co previsto na disposición adicional cuarta do Real decreto 1721/2007, do 21 de decembro, poderán acordar, a través dun convenio co Ministerio de Educación, a convocatoria e o cofinanciamento con cargo aos seus propios orzamentos do 50 por cento das bolsas que se lles concedan aos estudantes cuxa renda familiar se sitúe dentro do intervalo fixado no artigo 9, números 1 e 5 deste real decreto.

Disposición derradeira primeira. *Título competencial e carácter de lexislación básica.*

Este real decreto ten carácter básico e dítase ao abeiro das regras 1.^a e 30.^a do artigo 149.1 da Constitución, que reservan ao Estado a competencia para establecer as normas básicas para o desenvolvemento do dereito á educación, co obxecto de garantir a igualdade de todos os españois no seu exercicio.

Disposición derradeira segunda. *Modificación do Real decreto 1721/2007, do 21 de decembro, polo que se establece o réxime das bolsas e axudas personalizadas.*

1. Modifícase o parágrafo terceiro do número 1 do artigo 9, que queda redactado nos seguintes termos:

«O compoñente de compensación poderá revestir a modalidade de axuda compensatoria, bolsa salario ou bolsa de mantemento.

A bolsa salario destinarase a compensar a ausencia de ingresos que comporta a dedicación plena aos estudos. Os beneficiarios deberán estar cursando ensinanzas en modalidade presencial.»

2. Modifícanse os números 2, 3, 4 e 5 do artigo 22, que quedan redactados nos seguintes termos:

«2. Porén, poderán obter tamén bolsa os alumnos que se matriculen de entre 30 e 59 créditos nun curso académico. Neste caso serán de aplicación as seguintes regras:

a) Aqueles que opten pola matrícula parcial e non se matriculen de todos aqueles créditos que lles sexa posible poderán obter unicamente os compoñentes de matrícula, desprazamento, transporte urbano e material para estudos. Se, ademais, eses créditos se cursan nun único cuatrimestre/semestre, a contía da bolsa será do cincuenta por cento da bolsa de desprazamento ou transporte urbano que, de ser o caso, lles corresponderían máis os compoñentes de matrícula e material para estudos, que se aboarán na súa totalidade. Para manter a bolsa no seguinte curso deberán aprobar a totalidade dos créditos en que estivesen matriculados.

b) Aqueles que cursen estudos de grao en modalidade distinta á presencial poderán obter os compoñentes de matrícula, material para estudos e unha cantidade única en concepto de desprazamento. Se, ademais, eses créditos se cursan nun único cuatrimestre/semestre, a contía da bolsa será do cincuenta por cento da cantidade que lles correspondería en concepto de desprazamento máis os compoñentes de matrícula e material para estudos, que se aboarán na súa totalidade. Para manter a bolsa no seguinte curso deberán aprobar a totalidade dos créditos en que estivesen matriculados.

c) Naqueles casos en que, en virtude da normativa propia da universidade, resulte limitado o número de créditos en que poida quedar matriculado o alumno, este poderá obter todos os compoñentes de bolsa que lle correspondan se se matricula en todos aqueles en que lle sexa posible. Se eses créditos se cursan nun cuatrimestre/semestre, a contía da bolsa será do cincuenta por cento da cantidade que lle correspondería con excepción dos compoñentes de material escolar e matrícula, que se aboarán na súa totalidade. No suposto de que o alumno se

matricule tamén no segundo cuadrimestre/semestre correspondente ao curso académico, completárase a contía da bolsa co cincuenta por cento restante.

3. O número mínimo de créditos fixado nas alíneas anteriores en que o alumno debe quedar matriculado no curso para o cal solicita a bolsa non será exigible, por unha soa vez, no caso dos alumnos aos cales, para finalizaren os seus estudos, lles falte un número de créditos inferior a ese número mínimo, sempre que non desfrutasen da condición de bolseiro durante máis anos dos previstos no artigo 24.»

3. Modifícase o parágrafo segundo do artigo 26, que quedará redactado como segue:

«Porén, poderán obter tamén bolsa os alumnos que se matriculen de entre 30 e 59 créditos no curso académico, que deberán aprobar na súa totalidade para mantela no seguinte curso. Neste caso, serán de aplicación as seguintes regras:

a) Aqueles que opten pola matrícula parcial e non se matriculen de todos aqueles créditos que lles sexa posible poderán obter unicamente os compoñentes de matrícula, gastos de desprazamento, transporte urbano e material escolar. Se, ademais, eses créditos se cursan nun único cuadrimestre/semestre, a contía da bolsa será do cincuenta por cento dos compoñentes de desprazamento ou transporte urbano que lles corresponderían máis os compoñentes de matrícula e material escolar, que se aboarán na súa totalidade.

b) Aqueles que cursen estudos de máster en modalidade distinta á presencial poderán obter os compoñentes de matrícula, material para estudos e unha cantidade única en concepto de desprazamento. Se, ademais, eses créditos se cursan nun único cuadrimestre/semestre, a contía da bolsa será do cincuenta por cento da cantidade que lles correspondería en concepto de desprazamento máis os compoñentes de matrícula e material para estudos, que se aboarán na súa totalidade. Para manter a bolsa no seguinte curso deberán aprobar a totalidade dos créditos en que estivesen matriculados.

c) Naqueles casos en que, en virtude da normativa propia da universidade, resulte limitado o número de créditos en que poida quedar matriculado o alumno, este poderá obter todos os compoñentes de bolsa que lle correspondan se se matricula en todos aqueles en que lle sexa posible. Se eses créditos se cursan nun cuadrimestre/semestre, a contía da bolsa será do cincuenta por cento da cantidade que lle correspondería con excepción dos compoñentes de material escolar e matrícula, que se aboarán na súa totalidade. No suposto de que o alumno se matricule tamén no segundo cuadrimestre/semestre correspondente ao curso académico, completárase a contía da bolsa co cincuenta por cento restante.

d) O número mínimo de créditos fixado nas alíneas anteriores en que o alumno debe quedar matriculado no curso para o cal solicita a bolsa non será exigible, por unha soa vez, no caso dos alumnos aos cales, para finalizaren os seus estudos, lles falte un número de créditos inferior a ese número mínimo, sempre que non desfrutasen da condición de bolseiro durante máis anos dos previstos no artigo 29.

e) As materias ou créditos recoñecidos, validados e adaptados non se terán en conta para efectos do cumprimento dos requisitos académicos establecidos neste real decreto».

4. Modifícanse os números 2, 3, 4 e 5 da disposición transitoria única, que quedarán redactados como segue:

«2. Porén, poderán obter tamén bolsa os alumnos que se matriculen, polo menos, do 50 por cento dos créditos establecidos no punto anterior. Neste caso, serán de aplicación as seguintes regras:

a) Aqueles que opten pola matrícula parcial e non se matriculen de todos aqueles créditos de que lles sexa posible poderán obter unicamente os compoñentes de matrícula, gastos de desprazamento, transporte urbano e material escolar. Se, ademais, eses créditos se cursan nun único cuatrimestre/semestre, a contía da bolsa será do cincuenta por cento dos compoñentes de desprazamento ou transporte urbano que lles corresponderían máis os compoñentes de matrícula e material escolar, que se aboarán na súa totalidade. Para obter bolsa no curso seguinte deberán aprobar a totalidade dos créditos de que estivesen matriculados.

b) Aqueles que cursen estudos en modalidade distinta á presencial poderán obter os compoñentes de matrícula, material para estudos e unha cantidade única en concepto de desprazamento. Neste caso requirirase que o solicitante se matricule, polo menos de 30 créditos. Se, ademais, eses créditos se cursan un único cuatrimestre/semestre, a contía da bolsa será do cincuenta por cento da cantidade que lles correspondería en concepto de desprazamento máis os compoñentes de matrícula e material para estudos, que se aboarán na súa totalidade. Para manter a bolsa no seguinte curso deberán aprobar a totalidade dos créditos en que estivesen matriculados.

c) Naqueles casos en que, en virtude da normativa propia da universidade, resulte limitado o número de créditos en que poida quedar matriculado o alumno, este poderá obter todos os compoñentes de bolsa que lle correspondan se se matricula en todos aqueles en que lle sexa posible. Se eses créditos se cursan nun cuatrimestre/semestre, a contía da bolsa será do cincuenta por cento da cantidade que lle correspondería con excepción dos compoñentes de material escolar e matrícula, que se aboarán na súa totalidade. No suposto de que o alumno se matricule tamén no segundo cuatrimestre/semestre correspondente ao curso académico, completárase a contía da bolsa co cincuenta por cento restante.

d) O número mínimo de créditos fixado nas alíneas anteriores en que o alumno debe quedar matriculado no curso para o cal solicita a bolsa non será exigible, por unha soa vez, no caso dos alumnos aos cales, para finalizaren os seus estudos, lles falte un número de créditos inferior a ese número mínimo, sempre que non desfrutasen da condición de bolseiro durante máis anos dos previstos no número 13 seguinte.»

Disposición derradeira terceira. *Desenvolvemento normativo.*

Correspóndelle ao ministro de Educación, no ámbito das súas competencias, ditar as normas que sexan precisas para a aplicación e o desenvolvemento do establecido neste real decreto.

Disposición derradeira cuarta. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 7 de maio de 2010.

JUAN CARLOS R.

O ministro de Educación,
ÁNGEL GABILONDO PUJOL